

六  
典  
通  
考

六典通考卷二

湖西閣鎮珩輯

設官考

地官沿革

大司徒少皞祝鳩氏爲司徒堯時舜爲司徒舜攝帝位命契爲司徒契元孫之子曰微亦爲夏司徒周時司徒爲地官秦置丞相省司徒漢初因之至哀帝元壽二年罷丞相置大司徒後漢大司徒主徒衆教以禮義建武二十七年去大爲司徒公建安末爲相國魏黃初元年改爲司徒晉司徒與丞相通職更置迭廢未嘗並立至永嘉元年始兩置焉宋制司徒金章紫綬進賢三梁冠佩山元玉掌治民事考四方功課歲

盡奏其殿最而行賞罰亦與丞相並置齊司徒領天下州郡  
名數戶口簿籍梁罷丞相置司徒歷代皆有後周依周禮立  
大司徒卿隋及唐復爲三公宋仍舊制政和二年罷遼金元  
復爲三公明無是官元建三公有大司徒大司空仁宗延祐  
五年監察御史上言近聞禮部奉旨鑄  
太尉司空司徒等印共二十有九此輩無功於國家誠恐載  
在史冊貽笑將來請自今以後凡閭閻貴重勳業昭著者存  
畱一二餘並  
革去制曰可

大司徒今戶部尙書漢武帝置尙書郎五人三曰民曹魏置  
左氏尙書晉省之而吳有戶部晉有度支皆主算計晉惠帝  
時有右民尙書東晉及宋齊有度支尙書後周如周制大司  
徒所屬有民部中大夫二人隋初度支尙書并後周民部之  
職開皇三年改爲民部唐以太宗諱改爲戶部顯慶元年改

爲度支記朔二年改爲司元太常伯咸亨元年復爲戶部光宅二年改爲帝官尙書神龍元年復舊初戶部居禮部後武太后改置天地四時之官以戶部爲地官遂居禮部前云宋初戶部判司事一人元豐改官制罷三司歸戶部左右曹三司者鹽鐵戶部度支也遼北面有北南大王二院分掌民政視戶部南面尙書同吏部金戶部尙書一員正三品元置三員明初沿唐制設戶部尙書隸中書省統民部度支金部倉部四部後改爲十二部又改爲十二清吏司永樂宣德間增爲十三司

夏原吉以戶部尙書參謀密勿加少保領尙書事印成局三公領六卿之遺宣德五年命李昶爲戶部尙書專督倉

繕造爲定制

杜佑謂戶部之職與地官之任雖同若考其沿革則戶

部合出于度支度支主計算之官也唐六典序官曰戶部原出後漢之民曹亦兼及于度支二說微有異同今按周禮天官司會乃後世度支計算之任而戶部本爲民部實兼前代左民右戶之職當依六典爲允

小司徒中大夫後周如周制隋煬帝始置民部侍郎唐因之後改爲戶部侍郎龍朔二年改爲司元少常伯咸亨光宅神龍並隨曹改復宋初戶部侍郎之職歸三司元豐中置侍郎二員左曹五案戶口賦稅農田檢法知雜右曹五案常平免役坑塹場檢法知雜遼南面戶部侍郎同吏部金戶部侍郎二員元因之明戶部侍郎左右各一人提督倉場侍郎或尙書一人

小司徒掌六畜車輦漢魏晉並太僕屬官車府令掌之東晉

省太僕還隸尚書駕部宋齊梁陳車府乘黃令丞掌之後魏  
北齊則乘黃車府令兼掌之後周則司車輅掌之隋又以乘  
黃車府令丞掌之煬帝置殿內省尚輦局奉御二人唐因之  
龍朔二年改爲奉輦大夫咸亨元年復舊直長四人隋置唐  
因之宋尚輦掌乘輿之事神宗詔御輦院不隸省寺令專達  
焉遼殿中司有尚輦局金有尚輦局使元侍正府尚飾奉御  
兼尚輦明司設監  
奉掌輦輅

司徒屬官下大夫蓋郎中之任漢尚書郎一人主戶口墾田  
吳有戶曹郎魏有左民部郎曹晉兼置右民郎曹東晉及宋  
齊有民部曹梁陳爲左戶郎後魏爲左戶曹郎北齊有左右  
民曹郎隋初置侍郎二人煬帝除侍字改民部郎唐爲郎中

龍朔中改爲司元大夫後復改郎中宋郎中左曹右曹掌分  
曹治事建炎三年省并郎曹惟戶部五司不并各置一員  
熙九年詔戶部郎中兼主管左藏南庫遼南面戶部郎中同  
吏部金戶部郎中二員元因之明十三清吏司各郎中一入  
司徒屬官有上士今戶部員外郎之任隋開皇中置民部員  
外郎煬帝改民曹承務郎唐改戶部員外郎貞觀咸亨龍朔  
光宅神龍並隨曹改復宋員外郎二人掌天下州縣戶口之  
數遼戶部員外郎同吏部金員外郎三員元因之明十三司  
各員外一人

鄉師後周有鄉伯中大夫小鄉伯下大夫上士鄉正上士中  
士自後無聞

鄉老二鄉則公一人鄉大夫每鄉卿一人管仲治齊士鄉十五公與高國各帥其伍列國孤卿亦董鄉事自後無聞

州長黨正族師閭胥鄙師鄉長里宰鄰長杜佑曰皆鄉里之官各掌其鄉黨州里之政理秦制十里一亭亭有長十亭一鄉鄉有三老有秩嗇夫游徼三老掌教化嗇夫職聽訟收賦稅游徼巡禁盜賊漢鄉亭官皆依秦制高后元年初置孝悌力田二千石者一人後廢文帝十二年又置三老及孝悌力田無常員平帝置外史閭師官後漢鄉亭官與漢同有秩郡所置秩百石掌一鄉人其鄉小者縣置嗇夫一人平其差品三老掌教化凡有孝子順孫貞女義婦讓財救患及學士爲民式者皆扁表其門以興善行里有里魁民有什伍善惡以告



里魁長一里百家什主十家伍主五家以相檢察民有善惡以告監官晉縣五百戶以上皆置一鄉三千戶以上置二鄉五千戶以上置三鄉萬戶以上置四鄉鄉置嗇夫一人縣率百戶置里吏一人戶千以上置校官掾一人縣皆置方畧吏四人宋五家爲伍伍長主之二伍爲什什長主之十什爲里里魁主之十里爲亭亭長主之十亭爲鄉鄉有鄉佐三者有秩嗇夫游徼各一人所職與秦漢同隋用周齊州郡縣職自州都郡正縣正以下皆州郡將縣令自調用理時事開皇初謂之鄉官官別置品皆吏部除授每歲考殿最十五年置州縣鄉官唐凡百戶爲一里里置正一人五里爲一鄉鄉置耆老一人以耆年平謹者縣補之亦曰父老貞觀九年每鄉置

長一人佐二人至十五年省太極元年初令老人年九十以上  
上被服下州刺史朱衣執象笏八十以上板授上州司馬綠  
衣執木笏天寶七年詔父老六十以上板授本縣丞七十以  
上授縣令三十里置一驛驛各有將以州里富強家主之至  
德後民貧不堪命遂以官司掌焉自宋至明鄉官不置皆爲  
職役

封人春秋時有顓谷封人饒封人自後無聞

鼓人漢有承華令典黃門鼓吹百三十五人屬少府晉置鼓  
吹令丞屬太常丞帶省太樂并鼓吹哀帝復省鼓吹而存太  
樂令丞屬太常丞帶省太樂并鼓吹哀帝復省鼓吹而存太  
樂令丞及清商部並屬太常隋有鼓吹清商二令丞至煬帝

罷清商署唐鼓吹署令丞各一人所掌頗與太樂同宋鼓吹局令丞一人崇甯後隸大晟府遼鼓吹署有令丞各一人金太樂署兼鼓吹署元無明亦不置

舞師春秋傳舞師題以旌夏蓋列國有是職自漢迄明各有文武二舞其籍總隸于太常舞師不見專官唐六典凡習樂立師以教每歲考其師之課業爲上中下三等其習業者旣成得進爲師大抵歷代樂教多循此法

牧人秦漢內史左馮翊有廩犧令丞並掌犧令丞並掌犧牲屬司農後漢河南尹屬官有廩犧丞魏晉宋因之齊職儀令品第七秩四百石梁太常卿統廩犧令丞爲三品勳位陳後魏北齊隋皆有之唐置令丞各一人掌犧牲粢盛之事宋廩

儀屬光祿寺有牛羊司供應所掌大中小祀之牲牷及大官宴享膳羞之用監官三人監棧園三人金皇統八年以太廟令丞兼廩犧署令丞元因之明洪武三年置神牲所設廩牲令尋罷洪熙元年置犧牲所吏目

牛人漢六廐牛羊無數以給犧牲北齊太僕寺統左右牧駝牛署後周有典牛中士隋有牛羊署令丞唐分爲牧監宋有牛羊司金尚廐局直長司馬牛羣元尙牧所提舉屬光祿寺開初置司牲司後爲司牧局有署正有丞宋人載師後世不置

國師漢平帝設閭師官後無聞

縣師遺人均人後周有司均上士中士掌遺中士

師氏中大夫漢置博士至東京十四人一人爲祭酒謂之博士祭酒本曰僕射中興轉爲祭酒魏因之晉武帝咸寧四年初立國子學置祭酒一人介幘皂朝服進賢兩梁冠佩水蒼玉舊視侍中列曹尚書宋不置學助教惟置一人而祭酒博士常置太始六年置總明觀祭酒有元儒文史四科科置學士各十人齊建元四年有司奏置國學祭酒准諸曹尚書博士准中書郎助教淮南臺御史齊梁號爲國師陳後魏亦曰國子祭酒又立太學置五經博士北齊國子寺祭酒一人隋開皇十三年國子寺罷隸太常又改寺爲學仁壽元年置國子學立太學省國子祭酒博士置太學博士總知學事煬帝改國子學爲監置祭酒唐因之龍朔二年改爲司成館改祭

酒爲大司成咸亨初復舊光宅元年改監爲成均神龍元年復舊領國子學太學四門律學書學算學置祭酒一人宋國子監判監事二人凡監事皆總之祭酒掌國子太學武學律學小學之政令中興初并國子監歸禮部紹興中置國子監及祭酒復建太學遼南面國子監置于上京中京國子學隸焉官曰祭酒司業監丞主簿金海陵初置國子監國子學太學皆隸焉元至元初以許衡爲集賢館大學士國子祭酒二十四年始置監祭酒司業明洪武元年定國子學官制十年置中都國子學十四年定祭酒一人司業二人永樂元年設北京國子監後定鼎北京于畱都加南京二字以別之保氏秦諫大夫屬中令無常員漢武帝置諫議大夫秩比六

百石魏因之晉宋齊梁陳並置後魏列正四品北齊集書省  
諫議大夫七人後周保氏下大夫一人隋如北齊置七人屬  
門下省唐置四人龍朔二年改爲正議大夫神龍初復舊宋  
初門下省置左諫議大夫元豐增置右諫議大夫屬中書省  
金立諫院左右各設諫議大夫元因之明諫議屬臺省不置  
此官

司諫後周有司諫上士中士宋置諫院知院官六人以司諫  
正言充職金諫院置左司諫右司諫皆正五品元如金制司  
救後周有司救上士中士

調人後周有調人中士下士屬秋官府媒氏後周有司媒上  
士中士

司市下大夫其屬有廛人胥師司戒司稽肆長蓋諸市官也  
漢京兆尹屬官有長安市長丞後漢河南尹屬官有洛陽市  
長丞魏晉因之東晉隸丹陽尹宋齊因之梁改隸太府梁選  
部有大市令屬四品天監三年革其選陳因之後魏京邑市  
令從五品北齊司州牧領東西市署令丞後周如周制隋司  
農寺統京市令丞煬帝改隸太府唐因之兩京諸市各令一  
人宋置都提舉市易司金中都市易司令一人元有大都提  
舉市令司明以兩京府尹每月奏平市價不設市官

賈人秦置平準令漢因之秩六百石掌知物價後漢平準令  
丞隸大司農嘉平四年改爲中準使宦者爲之列內署自是  
諸署悉以閹人爲令丞魏少府屬官有平準令宋惟掌染順



帝卽位曰帝諱準改曰染署齊又曰平準屬少府梁陳曰平水令丞北齊平準屬司農後周曰平準中士下士隋初如北齊煬帝改隸太府唐因之令二丞四掌官市易宋市易上下界平百物通邊糴以都提舉市易司總焉元符三年改市易務爲平準務金平準務使副各一屬戶部中統四年詔立平準庫以平物價明無

廬人中士下士後漢雒陽市丞一人三百石魏晉宋齊因之梁有太市北三市丞位在七班之下陳因之後魏關北齊有東西市丞後周有小司市上士下士一人隋有京南丞唐因之宋襍買物掌和買百物以供宮禁官府所需金中都買物司使掌收買宮中所用諸物亦其類也

泉府漢少府所屬有均官長丞王莽立五均官更名長安東西市令及雒陽邯鄲臨淄宛成都市長皆爲五均司市稱師或市稱京西市稱畿雒陽稱中餘四都各用東西南北稱皆置交易丞五人錢府丞一人宋市易上界掌歛市之不售貨之滯于民用者金中都流泉務聽民典質物什取一爲息使副各一人元廣誼司總和僱和買之務司令二員正三品初名覆實司辨驗官兼提舉市令司後改

泉府上士後世錢官漢武帝禁郡國盜鑄專令上林三官鑄錢名曰五銖錢初屬少府後屬水衡光武復五銖錢屬司農魏晉因之江左以來或屬少府或屬司農後魏鑄太和五銖北齊鑄常平五銖唐少府置十鑪諸州鑄錢監屬焉官及丞

各一人宋因之遼鑄錢四等金諸州各設錢監元武宗始行錢法置寶泉提舉司明初行鈔太祖設寶源寶泉局各有使司而錢法以戶部總之

司門千寶注曰若今校尉漢城門校尉掌京師城門屯兵有司馬丞各一十二城門候各一蓋兼監門將軍之職魏因之晉制銀章青綬絳朝服武冠佩水蒼玉元帝省宋齊俱以衛尉掌宮城屯兵及管鑰梁陳依秦漢以光祿卿等掌宮殿門戶無城門之職後魏置城門校尉北齊城門校尉二人掌宮殿城門并諸倉管鑰後周地官府置宮門上士下士各一人城門中士下士各一人掌皇城十二門之禁令隋門下省統城門局校尉二人煬帝改隸殿中省減一人後又改校尉爲

城門郎置四人復隸門下省唐因之城門郎置門僕八百人  
分番上下掌送管鑰宋以皇城司掌宮殿門又置監門衛上  
將軍總亦設皇城使金都城十四門各門有尉有副尉元大  
都城門尉二員副尉二員掌門禁啟閉管鑰之事凡十一門  
每門設尉及副隸大都畱守明京城各門置守門千戶所  
司門下大夫歷代多闕後周依周官隋文帝置司門侍郎煬  
帝除侍字唐武德三年加中字龍朔二年改爲司門大夫咸  
亨元年復舊

司門上士後周依焉隋置司門員外郎唐因之大歷十二年  
拜劉廼爲司門員外郎宋司門郎中分案二置吏五員外郎  
同掌門關禁令金刑部郎一員掌城門啟閉明刑部所屬有

司門部郎中員外各二人

唐權德輿司門員外郎壁記曰周官司門爲司徒之屬今爲同寇之

屬員外郎千周爲上士後數更其名至隋爲承務郎武德初定爲今制秩從六品上士

司關上士周尹喜爲關令漢寧成爲關都尉並其職也隋立上關中關下關令各一人唐因之金設關使兼護察官正七品明關隘要處各置巡檢司

掌節漢舊儀曰周禮有典瑞掌節之士所以宣命重威爲國信者也漢少府官屬有符節令秩千石後漢有符璽郎四人符節令一人六百石爲符節臺主符節事餘見春官典瑞遂人遂師遂大夫自秦廢阡陌遂制無聞其官亦闕

縣正春秋時上大夫受縣下大夫受郡縣邑之長曰宰曰尹曰令曰大夫其職一也至戰國郡大縣小故甘茂云宜陽大

縣名曰縣其實郡也漢因秦制列侯所食縣曰國皇太后公主所食曰邑有蠻夷曰道凡縣萬戶以上爲令減萬戶爲長侯國爲相秩次亦如之成帝綏和元年長相墨綬哀帝建平二年復黃綬秋冬集課上計於所屬郡國其郡有鹽官鐵官工官鄣水官者隨事狹廣置令長及丞秩次皆如縣道無分土給均吏晉置大縣令有治績官報以大郡不經宰縣不得入爲臺郎宋諸縣署令銅印墨綬進賢兩梁冠自晉宋以後令長國相皆如漢制後魏縣置三令長孝文初置縣令能靜一縣劫盜者兼理二縣卽食其祿能靜二縣者兼理三縣三年遷爲郡守北齊制縣爲上中下三等每等又有上中下自上上縣至下下縣凡九等隋縣有令有長唐縣有赤綬望緊

上中下七等宋建隆三年始以朝臣爲知縣復畚用京官幕  
職爲之遼五京諸州屬縣各有縣令縣丞主簿尉金赤縣令  
從六品次赤縣曰劇縣令正七品諸縣令從七品凡縣二萬  
五千以上爲次赤爲劇二萬戶以上爲次劇在京倚郭者曰  
京縣自京縣而下萬戶以上爲上縣三千戶以上爲中縣不  
滿三千戶爲下縣元至元三年併江北州縣六千戶以上者  
爲上縣二千戶以上者爲中縣不及二千戶爲下縣二十年  
又定江淮以南三萬戶上爲上縣一萬戶上爲中縣一萬戶  
下爲下縣上縣從六品達魯花赤一尹一中縣正七品下縣  
從七品達魯花赤及尹悉如上縣之制明太祖初定縣三等  
賦十萬石以下爲上縣知縣從六品六萬石以下爲中縣正

七品三萬石以下爲下縣從七品已而並改正七品京縣正六品

旅師稍人委人土均草人土訓誦訓歷代皆闕

稻人上士中士下士漢有稻田使者魏有農部郎曹後周小司水上士唐有司田大夫亦曰水部郎中宋置農田水利司金章宗命勸農司興作水田元有稻田提舉司明初設庸田署令後置水部郎中主灌田水利舟楫磴碾不得與爭利

山虞澤虞魏尙書有虞曹郎中晉因之梁陳曰侍郎後魏北齊虞曹掌地圖山川遠近園囿田獵雜木等並屬虞部尙書後周有虞部下大夫一人掌山澤草木鳥獸而阜蕃之又有小虞部並屬大司馬隋初爲虞部侍郎屬工部煬帝除侍字



唐武德中加中字龍朔二年改爲司虞大夫咸亨元年復舊  
天寶十一年又改虞部爲司虞至德初復舊宋建炎二年詔  
工部兼虞部明工部虞衡清吏司郎中一人

林衡歷代不設惟明宣德中置林衡署典果實花木典署署

丞各一人川衡漢武帝置水衡都尉掌上林苑

王莽改曰予虞後漢

光武省之并其職于少府每立秋軀劍之日輒暫置水衡都

尉事訖省初秦漢又有都水長丞漢武帝以都水官多乃置

左右使者以領之哀帝省使者官至東京凡都水皆罷之晉

武帝省水衡置都水臺有使者一人元康中復有水衡都尉

宋都水使者銅印墨綬進賢兩梁冠與御史中丞同孝武初

省都水臺罷都水使者置水衡令孝建元年復置齊有都水

臺使者一人梁初與齊同天監七年改都水使者爲大舟卿  
位視中書郎陳因之後魏初有水衡都尉永平二年都水臺  
依舊置二使者北齊亦置二使者隋開皇二年廢都水臺入  
司農十三年復置仁壽元年改臺爲監更名使者亦爲監煬  
帝又改爲使者尋又爲監加置少監又改監及少監並爲令  
唐武德八年置都水臺後復爲都水署置令隸將作貞觀中  
復爲都水監置使者龍朔二年改都水使者爲司津監丞咸  
亨元年復舊光宅元年改都水監爲水衡置都尉神龍元年  
復爲都水監置使者二人宋都水監判監寺一人同判監一  
人建炎三年詔都水監置使者一員紹興十年省併其職於  
工部遼南面都水監設太監少監並監丞主簿金都水監有

都監少監元都監二員少監一員明設都水司官屬工部  
迹人閭人漢水衡都尉後漢曰上林苑令丞魏晉因之江左  
無聞宋初復置隸尙書殿中曹齊因之梁陳屬司農北齊及  
隋亦然唐因之令一丞四宋四園苑提舉官無常員東曰宜  
春南曰玉津西曰瓊林北曰瑞聖監官各二人又有西京官  
苑司勾當官一人元豐後四園苑屬司農金上林署屬工部  
設提點官從五品元置上林署令丞各一明上林苑監左右  
監正監副監丞各一人

中人漢郡縣產鐵者置鐵官唐有鹽鐵使宋置提舉坑冶司  
凡監冶場務二百有一或以運司州縣官兼領金戶部郎中  
掌鑄錫坑冶等事元有採金鐵冶都提舉司秩正四品又有

鐵冶提舉司淘金總管府明天順中開各直省金銀礦多以

中官提督焉

明中官充鑛使不常設萬厯時最爲民害

角人羽人掌葛掌染沿革未詳

掌炭漢鈎盾令屬少府後漢亦有之晉大鴻臚屬官有鈎盾

令自後無聞北齊如晉制隋如北齊令三丞十二唐因之令

二人丞四人掌薪炭鵝鴨菰澤之物

天寶五載九月侍御史楊釗充木炭使自後相

承或以京尹或以戶部侍郎爲之

宋以後不置宋司農寺置內柴炭庫掌諸

薪炭以給宮城及宿衛班直軍士薪炭席薦之物炭場掌儲

炭以供百司之用金設典給署卽漢之鈎盾署掌官中薪炭

水燭元上都大都柴炭局提領大使副使各一員隸徽正院

明工部提督易州山廠一人主御用柴炭

掌荼掌蠶後世闕

場人漢有果丞唐有上林署令掌種植蔬果之事元有養種園提領供進蔬果明上林苑監屬有林衡嘉蔬二署典蒔藝瓜菜各典署一人丞一人

廩人秦有太倉令丞漢因之屬大司農後漢太倉令六百石主受郡國轉漕穀其滎陽敖倉中興皆屬河南尹官魏品第七晉太倉令銅印墨綬朝服進賢一梁冠品第七月俸月二十斛品俸與太醫令同江左以來又有東倉石頭倉丞各一人北齊司農統太倉令丞後周曰司倉下大夫隋置太倉署令二人米廩督二人穀廩督四人唐太倉署令三人東都曰含嘉倉宋京城諸倉總二十五各置監官二人元豐後二十

五倉屬司農中興後又有豐儲倉監官二員金大倉使副使掌九穀庫藏出納元京師二十二倉秩正七品使副各二人明初軍儲倉二十所各設官司永樂中置倉場總督一人舍人漢置中書舍人尙書郎直宿建禮門奏事明光殿魏初置中書通事一人主呈奏晉初置舍人一人東晉合通事舍人二職謂之通事舍人宋置通事舍人四員入直閣內梁多置通事兼領後除通事字直曰中書舍人魏晉以來詔誥皆置於中書令及中書侍郎自是皆舍人專之後魏有舍人省其屬置小史上士二人隋置內史舍人八員煬帝減四人後改爲內書舍人唐武德中改爲中書舍人置六員龍朔中改西臺舍人光宅中改鳳閣舍人開元中改爲紫薇舍人宋初

中書舍人爲遷官不任職後復改知制誥及直舍人院元豐  
五年始正官名故事舍人年久者謂之閣老中書舍人知制  
誥謂之外制中興以中書舍人爲長官後又詔以他官兼攝  
者稱權直資淺者爲直舍人院遼中書省設中書舍人院有  
中書舍人金元無明中書舍人屬內閣革中書省存中書舍  
人

倉人魏晉而下有倉部郎中梁陳爲侍郎宋齊以度支尙書  
領之後魏有太倉尙書後周有司倉下大夫隋初置倉部侍  
郎煬帝止曰倉部郎唐武德三年加中字龍朔二年改司庾  
大夫咸亨復舊天寶爲司儲郎中宋設倉部判司事一人別  
置提點倉場官元豐官制行郎中員外郎始實行本司事金

有提舉倉場司使副元中都諸倉各置監支納一員及大使副使明戶部官屬四曰倉部如唐宋制

司祿中士下士秦漢以來百官奉秩多掌于少府司農歷代因之唐則以太府監司農卿戶部郎中分主其事宋金元略同明併其事于戶部洪武十三年置判錄司掌京官俸給尋罷

司祿下士漢有農官屬大司農魏初置典農官晉太康二年罷典農官爲郡縣後復有之梁置勸農謁者隸司農卿陳因之後周司農上士一人掌三農九穀稼穡之政令隋罷典農署置諸屯監各掌其屯稼穡畿內者隸司農自外者隸諸州唐因之置監及丞又改司農爲司稼大夫尋復舊宋立常平



斂散法置提舉司主行農田水利尋罷金立勸農使司興定  
二年改立爲司農使司掌勸課力田之事元世祖立務農司  
各行省設勸農營田司使副又召能種田者爲農師明農田  
隸戶部不設專官

春人秦漢少府屬官有導官令丞主擇米以供祭祀及御膳  
後漢屬大司農令六百石丞三百石主春御米飛麪厯代皆  
有之並屬司農唐置令二丞四掌春碾米麪油燭之事宋以  
後不置宋司農寺置都麪院掌造麪以供內酒庫酒醴之用  
水磨務掌水磴磨麥以供尙食及內外之用元供膳司掌供  
給應需貨買百色生料隸司農有提點令丞等官又有油戶  
提領所麪戶提領所明無

饔人女饔八人唐六典內官有典饔司饔掌饔等名宋金元明亦有之皆宮中女使

藥人後代無

### 春官沿革

唐虞伯夏爲秩宗周曰大宗伯秦改曰奉常漢初曰太常欲令國家尊大常存故稱太常惠帝更名奉常景帝六年更名太常後漢同建安中爲奉常魏黃初元年改爲太常魏晉皆銀章青綬進賢兩梁冠絳朝服佩水蒼玉宋太常用尙書亦轉爲尙書齊因之梁爲春卿位視金紫光祿大夫陳因之梁後魏爲上卿兼置少卿官北齊爲太常寺置卿及少卿丞各一人後周建六官置大宗伯卿爲春官隋與北齊同煬帝加

置少卿二人唐因之龍朔二年改爲奉常咸亨元年復舊光宅元年改爲司禮神龍初復舊卿一少卿二宋初設太常寺判事元豐中正名始專其職寺曰容臺曰司禮寺又曰禮院中興罷寺監獨存太常又命太常兼宗正紹興復舊遼南面有太常寺卿金太常寺卿一員元置太常禮儀院仁宗復爲太常天厯二年置院使二人明初置太常司設卿已又改司爲寺永樂十九年定鼎北京在畱都者加南京二字小宗伯今少卿之職秦漢無聞後魏太和初置少卿一人正四品上北齊因之後周爲小宗伯景明初少卿爲第一清選以明禮樂兼天文陰陽者爲之隋初置一煬帝置二人唐因之龍朔咸亨光宅神龍並隨曹改復宋少卿無職事元豐正

名始有職掌建炎初詔太常少卿一員兼宗正少卿遼金太常少卿皆一員元置太常院同知二員明南北太常少卿各一員

大宗伯今禮部尙書漢成帝置四尙書其次曰客曹主外國夷狄事光武分六曹吏部曹兼掌齋祀則夷狄齋祀皆今禮部職也唐尙書有祠部曹及晉江左有祠部尙書掌廟祧之禮後魏名儀曹尙書北齊復爲祠部後周置春官大宗伯卿隋更爲禮部尙書唐因之龍朔中改爲司禮太常伯咸亨元年復舊光宅中爲春官尙書神龍初復故宋禮部判部事二人元豐改官制其屬有四一曰禮部二曰祠部三曰主客部四曰膳部遼北面以都司掌禮儀視禮部南面有禮部尙書

金禮部尙書一員元禮部尙書三員元貞元年復增一員領

金禮部尙書明初禮部尙書屬中書省後罷省升部秩定置一

人以本等爲春官尋罷

小宗伯後周如周制隋煬帝初置禮部侍郎唐龍朔中改爲

司禮少卿伯咸亨光宅神龍並隨曹改復開元中始以禮部

郎掌貢舉遂爲定制宋侍郎貳尙書之事南渡諸曹長貳互

置紹興七年置禮部侍郎二員隆興初置一員遼南面禮部

侍郎同吏部金禮部侍郎一員正四品元禮部侍郎二員明

禮部左右侍郎各一人

肆師下大夫魏尙書有儀曹郎掌吉凶禮制歷代多有宋齊

儀曹屬祠部後周依周官隋初爲禮部侍郎煬帝除侍字又

改爲儀曹郎唐武德初改爲禮部郎中龍朔二年改爲司禮  
大夫咸亨初復故其後曹改而官不易宋禮部郎中掌文翰  
謂之南曹舍人又謂之名表郎官別有印建炎中詔禮部郎  
官一員兼主客遼南面禮部郎中同吏部金禮部郎中一員  
元禮部郎中二員明禮部儀制清吏司掌禮文宗封學校科  
貢之事以贊尙書郎中一人肆師上士後周依焉隋文帝置  
禮部員外郎煬帝改爲儀曹丞務郎唐武德三年復故其後  
曹改而官不改宋禮部員外郎參決儀制掌撰表文與郎中  
同遼南面禮部員外郎同吏部金禮部員外郎一員元增爲  
六明禮部清吏司員外郎一人

鬱人邕人雞人後周有掌鬱司邕司鷄中士正二命下士正

一命司尊彝司几筵後周依周禮中士正二命下士正一命  
天府唐有天府院藏大享之寶器宋有祭器庫法物庫專知  
官並屬太常元禮部所屬法物庫秩五品

典瑞秦漢有符節令丞領符璽郎文帝二年初與郡守爲銅  
虎符竹使符之制又皆屬焉後漢有符節令兩梁冠位次御  
史中丞別爲一臺屬少府魏同後漢晉太始初省併蘭臺置  
符節御史掌其事宋齊蘭臺有主璽令史以治書侍御史領  
之梁陳御史臺亦有符節令史後魏御史臺領符節令符節  
令領符璽郎中北齊符節署令一人符璽郎中四人餘同後  
魏後周有主璽下士隋初符璽局置監二人屬門下省煬帝  
改監爲郎唐因之長安三年改爲符寶郎神龍初復爲符璽

郎開元初復爲符寶郎宋無考遼符寶司屬門下省有符寶郎金銀符寶郎四員掌御寶及金銀等牌屬殿前都檢點司元初立符寶局後改典瑞監大德中改監爲院置使四員明尙寶司郎符璽郎卿少卿各一人

典命後周春官府有典命掌內外九族玉器衣服之令後改爲大司禮儀改爲禮部謂之禮部大夫時盧愷爲禮部大夫充聘陳使

司服戰國有尙衣尙冠之職秦漢有御府令丞掌供御服屬少府後漢有掌宦者典官婢作中衣服魏因之晉屬光祿勳江左省宋大明中改尙方曰左右御府各置令丞一人後廢帝初省御府置中署隸右尙方其後又置初宋氏用三品勳



位明帝改用二品淮南臺御史掌金銀綵帛凡諸造作以供  
奉及妃主六宮梁陳其職隸左尙方後魏有掌服郎北齊門  
下省統主衣局都統子統各二人後周有司服上士中士各  
二人隋分扇殿內省後又改爲尙衣局置奉御二人唐因之  
龍朔三年改爲奉冕大夫咸亨元年復舊直長隋置八人唐  
因之減二人宋裁造院掌裁製服飾文繡院供乘輿服御並  
屬少府其尙衣使下又有衣徒遼內省置尙衣庫使其殿中  
司所屬有尙衣奉御金尙衣局提點使副掌御用衣服冠帶  
元大都尙衣局御衣局各有達嚕噶齊及提點一員屬將作  
院明宦官十二監有尙衣監太監一員掌御用袍服冠冕舄  
屨靴襪之事

與祀中士下士秦漢有太祝令丞屬奉常景帝改爲祠祀武帝更曰廟祀後漢祠祀屬少府魏晉有太祝令丞宋曰明堂令丞掌祀五帝之事齊有太祝及明堂二令梁有明堂太社二令並屬太常北齊太廟令兼領郊祀崇虛二丞後周有司郊上士中士司社中士下士隋太常統郊社署令丞又置門僕齋郎唐因之令丞各一人宋仁宗立郊社局令不主四郊之事至熙甯始正其職渡江初闕紹興十九年除韓彥直爲太社令請給主簿金郊社署隸太常設祝史齋郎百六十人大安元年奏兼武成王廟署令丞各一員掌社稷祠祀祈禱並廳舍祭器等物元郊祀署屬太常秩從六品令二丞一明太祖設各祠祭祀奉祀祀丞

守祧後周守廟中大夫小守廟下大夫唐宋後多以太廟署令丞兼掌之

世婦每宮卿一人秦皇后之卿曰將行漢景帝中六年更名大長秋舊有詹事一人位在長秋上成帝省之以其職並長秋其中長信長樂宮置少府一人職如長秋長樂又有衛尉僕爲太僕皆二千石在少府上魏制太后三卿在九卿下晉如漢齊置宣德衛尉少府太僕陳亦有太后三卿北齊有長秋寺卿一人隋唐宋皆無金太后兩宮官屬有衛尉副衛尉太僕副僕等官元長秋丞徵長寧長慶寧徵諸寺各置卿少卿明無

內宗外宗後世爲內命婦外命婦家人墓大夫後世闕

漢有諸陵

圖禮官屬太  
常與周禮異

大司樂中大夫太師下大夫秦漢奉常屬官有太樂令丞丞  
又少府屬官有樂府令丞後漢明帝改太樂爲大予樂令掌  
伎樂人凡國祭饗掌諸奏樂魏復曰太樂令丞晉亦有之齊  
銅印墨綬進賢一梁冠絳朝服梁陳因之後魏置太樂博士  
北齊曰太樂令丞後周有大司樂後改爲樂部有上士中士  
隋有太樂令丞一人唐因之宋太樂局令丞各一人樂正副  
使正各二人徽宗置大晟府以大司樂爲長典樂爲貳次曰  
太樂令主節宣和二年罷之遼太樂署有令丞金太樂署兼  
鼓吹署直長一員又有太樂正太樂副正元天樂署令丞各  
二明置神樂觀提點一知觀二又教坊司左右司樂各一人

隸禮部

樂師後周樂師上士中士又有小司樂下大夫上士隋太樂署樂師八人清商署樂師二人煬帝改曰正唐因之宋樂正三人金有太樂正副樂正元天樂署教師二人  
大胥小胥後周有樂胥中士下士

太師小師春秋列國多有之後無聞

瞽矇眡矇後世闕

典同漢有協律都尉晉有協律校尉後魏有協律郎唐宋元明同後魏

磬師鐘師漢有磬工鐘工後周有司鐘磬中士下士

笙師鐃師鞀師旄人後世闕後周有掌散樂中士下士

箒章後周無箒師有箒章中士下士

鞀鼓氏後世聞後周有典夷樂中士下士

歷代夷樂詳見樂制考

典庸器後周與庸器中士下士

司干後周有司舞中士下士

太卜秦漢有太卜令後漢并于太史自後無聞後魏有太卜

博士北齊有太卜局丞後周有太卜大夫小卜上士龜占中

士隋曰太卜令丞一人唐因之宋以太卜隸司天臺不置專

官明初置稽疑司有令及左右丞尋罷

龜人占人筮人後周有龜占筮占中士下士明初設司筮無

員數尋罷

華氏後世闕

占夢既祿後周有夢占視祿中士下士

詳見司天考

太祝殷官周因之秦漢有太祝令丞後漢亦曰太祝令丞晉宋齊梁陳後魏北齊皆因之後周依周官隋置太祝署太祝令丞煬帝罷署太祝八人唐初七人後增爲九人開元減置三人宋太祝次奉禮郎後無員數遼太常寺主簿下有太祝金太祝掌奉祀神主元太祝十員明一人

小祝後周有小祝下大夫

喪祝甸祝詛祝司巫後周有是四官並中士下士男巫女巫隋太卜署有男巫女巫唐巫師十五人

太史下大夫秦爲太史令漢武置太史公宣帝以其官爲令後漢因之自漢晉宋齊並屬太常銅印墨綬進賢一梁冠絳

朝承梁陳亦同後魏北齊如晉宋隋太史曹置令丞各二屬  
祕書省煬帝改曹爲監有令唐初改監爲局置令龍朔二年  
改太史局爲祕書閣改令爲郎中丞爲祕書閣郎咸亨初復  
舊初屬祕書省久視元年改爲渾天監不隸麟臺改令爲監  
置一人又改爲渾儀監長安二年復爲太史局隸麟臺其監  
復爲太史局令置二人景龍二年改局爲監不隸祕書開元  
二年復改令爲監十四年復爲太史局置令二復隸祕書後  
又改局爲監乾元元年又改爲司天臺宋有司天監天文院  
鐘鼓院元豐正官制以太史局隸祕書省其官有令有正有  
春夏中秋冬官正及靈臺郎保章正遼南面司天監有太史  
令其下有司曆五官正丞主簿等員金司天臺隸祕書監少



大典通考

卷二

雷

監判官教授司天管勾長行人五十人元初因金制立司天臺後改臺爲監置司天監三少監五丞四明初以劉基爲太史令後改爲院以基爲院使洪武元年改爲司天監二年改欽天監三十一年并麻法于欽天監置監正監副其屬主簿春夏中秋冬官正五官靈臺郎五官保章正五官挈壺正五官監候五官司麻五官司辰漏刻博士

馮相氏登高臺以視天文漢太史有二丞一在靈臺掌候日月氣魏太史有靈臺二丞晉宋齊梁陳太史皆有靈臺丞隋唐置天文博士掌教習天文氣色長安四年省博士置靈臺郎宋因之遼如宋制金有司天管勾從九品天文科女直漢人各六人元太史院靈臺郎一員正七品明五官靈臺郎八

人洪武四年改爲  
司正郎後復舊

保章氏中士下士秦漢以來無其職後周春官府置保章上  
士中士卽其任也隋置歷博士正九品上唐初因隋長安四  
年省歷博士置保章正宋遼皆有之金司天臺置算歷生八  
人元置保章正副各五員明五官保章正專志天文定察吉  
凶秩正八品

太史小史後周小史下  
大夫上士

秦有太史令胡無敬漢武帝置太史

公司馬遷父子爲之宣帝以其官爲令其修撰以他官領之  
王莽改置柱下五史記疏言行漢以後無聞唯魏太和中史  
職隸中書其餘多隸祕書唐武德初因隋置史官屬祕書省  
著作局貞觀三年移史館于門下省北宰相監修自是著作

局始罷史職及大明宮成置史館于門下省南其修撰以他官兼領開元中宰相李林甫監史奏移于中書省北宋置監修國史一人以宰相爲之修撰直館檢討無常員元豐改官制曰厯隸國史案別置國史實錄院以首相提舉翰林學士以上爲修國史餘侍從官爲同修國史庶官爲編修官實錄院提舉官如國史元祐初復置國史院隸門下省紹興復以國史院歸祕書省遼國史院設官曰監修國史曰史館學士曰修撰曰修國史金初國史院監修國史修國史皆一員同修國史二員編修入檢閱十元以翰林兼國史順帝時常以右丞相統之明初設起居注尋設翰林編檢等官皆充史官內史中大夫蓋後世中書之任也漢中書謁者令屬少府

詳見

復逆之官武帝以司馬遷爲中書令漢舊儀云中書謁者令領贊  
尚書秩千石後漢省魏武帝置秘書令文帝改爲中書令置  
監與令各一人晉氏監令並第三品秩千石東晉并入散騎  
省後復置宋齊同晉梁監令並增秩至二品陳因之後魏太  
和中定監從第二品令正三品北齊因之後周依周官增爲  
上大夫隋改中書省爲內史省置監令各一尋廢監置令與  
知政事遂爲宰相之任煬帝改爲內書省唐初爲內史省尋  
改爲中書省龍朔二年改省爲西臺令爲右相咸亨初復舊  
光宅二年改中書爲鳳閣令爲內史神龍初復舊開元元年  
改爲紫微令五年復舊宋沿唐制遼建政事省天祿十二年  
改中書省金初立中書省至海陵罷之元置中書令以皇太

子爲之明初仍建中書省不設令有左右丞相至十三年罷  
秦京師爲內史漢景帝分立左右內史諸王國亦有內  
史皆與周官名同而實異元至元二十九年改王傅爲  
內史秩從二品延祐五年升正二品亦沿漢王國之制  
惟隋文帝改中書省爲內史省唐光宅改中令爲內史  
則與周之掌八枋貳國令者爲近焉

小史掌邦國之志外史掌方志及三皇五帝之書並後世秘  
書之職也漢氏圖書或貯外府或藏中禁後漢桓帝始置秘  
書監一人掌典圖籍屬太常後省魏文帝改秘書令爲監掌  
文籍其蘭臺亦有藏書御史掌之晉惠帝置秘書監領著作  
局掌三閣圖書宋與晉同梁曰秘書省陳因之後魏亦有之

北齊依魏後周置外史下大夫隋亦置秘書省改監爲令唐  
初復爲監龍朔二年改爲蘭臺監其監曰太監咸亨初復舊  
天授初改爲麟臺監神龍初復舊其後國史太史分爲別曹  
秘書省但主校勘書寫而已宋太宗建崇文院及三館秘閣  
元豐正名以崇文院爲秘書省罷館職立監少官其屬有五  
著作郎著作佐郎秘書校書正字各以其職隸于長貳遠如  
宋制金秘書監設監少及丞各一員元制秘書監掌歷代圖  
籍卿四太監少監監丞各二明不設秘書監圖籍禁書藏之  
內府

御史職國時秦趙滛池之會各命御史書其事蓋記事之職  
也至秦漢爲糾察之任漢御史大夫與丞相並爲二府亦曰

憲臺後漢謂之御史臺又曰蘭臺寺梁及後魏北齊或謂之南臺後周曰司憲屬秋官府隋及唐皆曰御史臺龍朔二年改爲憲臺咸亨元年復舊初武后改御史臺爲肅政臺置左右肅政臺龍朔後去肅政之名爲左右御史臺太極元年罷右臺定制大夫一中丞二侍御史四殿中侍御史六監察御史十主簿一宋立三院曰臺院殿院察院始唐儀臺案有六監司元豐定制復六察以御史專領焉遼南面御史臺有大夫中丞及侍御史金御史臺增設治書侍御史二監察御史十二元皇慶間定制御史大夫二員明初設御史臺多仍宋元之制後改爲都察院設都御史副都御史僉都御史左右各一人十二道各設監察御史建文改爲御史府革十二道

置察院改諸御史爲拾遺補闕靖難後復故

巾車漢太僕屬官有車府令卽巾車之職沿革詳見小司徒  
又魏晉尙書有駕部郎其原出于巾車沿革詳見校人  
典路車僕後周有典路司車並中士下士又有司車路下大  
夫

司常後周有司常中士下士唐以後有三十二旗之名物掌  
于武庫令

都宗人家宗人後世闕

凡以神士者後周有神士中士下士



六典通考卷三

湖西閣鎮珩輯

設官考

夏官沿革

大司馬黃帝時容光爲大司馬其在少昊則睢鳩氏之任顓  
頊以司馬主火堯命羲和爲司馬夏官也虞夏二代以后稷  
居其職故尚書中侯曰稷爲大司馬舜爲太尉周文王時拜  
太公爲大司馬成王以畢公爲司馬秦漢之際項羽以曹無  
咎周殷並爲大司馬漢武帝元狩四年罷太尉始置大司馬  
以冠將軍之號宣帝地節三年置大司馬不冠將軍亦無印  
綬官屬成帝綏和元年初賜大司馬金印紫綬置官屬祿比

丞相去將軍哀帝建平二年去大司馬印綬官屬旋復賜印綬置官屬去將軍位在司徒上始置此官議者以漢有軍侯千人司馬官故加大字王莽居攝以漢無少司徒乃定司馬司空之號並加大字後漢建武二十七年省大司馬以太尉代之常與太尉迭置不並列靈帝末始置焉魏黃初二年復置大司馬以曹仁居之而太尉如故則太尉大司馬大將軍各自爲官位在三司上吳有左右大司馬晉定令亦在三司上武冠絳朝服金章紫綬佩山元玉與大將軍同宋時唯元嘉中用彭城王義康爲之齊以爲贈梁時置官屬陳以爲贈後魏北齊與大將軍爲二大位居三師之下三公之上後周復爲夏官謂之大司馬卿自隋而無

韋昭釋名曰司馬武也大司馬掌軍古者兵車

一車因馬故以馬名官訓  
馬爲武者取其速行也

大司馬今兵部尙書魏置五兵尙書

中兵外兵驍  
兵別兵都兵

晉初省太

康中置七兵尙書分中兵外兵各爲左右宋五兵尙書唯領  
中兵外兵二曹齊梁陳皆有之後魏爲七兵尙書北齊爲五  
兵統左中兵右中兵左外兵右外兵都兵五曹後周依周置  
大司馬卿其屬有兵部中大夫小兵部下大夫其職並缺隋  
改爲兵部尙書唐因之龍朔二年改爲司戎太常伯咸亨元  
年復舊光宅元年改爲夏官神龍元年復舊天寶十一年改  
爲武官至德初復舊宋仍唐制元豐中詔民兵悉隸兵部建  
炎中併衛尉歸兵部遼北面有北樞密院掌兵機武銓視兵  
部南面有兵部尙書金兵部尙書一員正三品元尙書三員

世祖中統元年以兵刑工爲右三部置尙書二員總領三部事已又別置工部以兵刑自爲一部尙書以二員爲額明初設兵部尙書屬中書省永樂辛丑兵部改置北京

小司馬中大夫後周依周制隋置兵部侍郎唐因之龍朔中改爲司戎少常伯光宅中改爲夏官侍郎咸亨神龍隨曹改復舊制一員總章元年加一員宋南渡後置侍郎二員隆興

置一員遼南面兵部侍郎同吏部金兵部侍郎一員正四品

元至治三年增侍郎二員品秩同吏部明兵部左右侍郎各

一人

嘉靖二十九年俺答犯京師改王邦瑞爲兵部左侍郎協理戎政專一操練遂爲常制明設四輔以杜敷等爲

夏官  
韓罷

軍司馬下大夫輿司馬中士魏有五兵晉有七兵皆置郎中

歷代或單爲郎或爲郎中後周中兵下大夫與司馬下士隋  
初爲兵部侍郎及員外郎煬帝改侍郎爲兵曹郎員外郎爲  
兵曹承務郎唐武德三年復爲兵部郎中員外郎龍朔中改  
司戎大夫司戎員外郎咸亨光宅神龍隨曹改復宋隆興初  
詔駕部兵部郎官共一員遼南面兵部郎中員外郎並同吏  
部金兵部郎中一員員外郎二員元增郎中爲二員員外郎  
同金明兵部武選清吏司郎中員外郎各一人又添設武選  
郎中一人

與司馬上士今駕部郎中沿革見後

行司馬中士後周有軍司馬旅下士唐節度有行軍司馬一  
人

司勳上士歷代無聞後周吏部有司勳上士一人掌六勳之  
賞隋文帝置司勳侍郎二人煬帝改爲司勳郎唐初爲司勳  
郎中龍朔二年改爲司勳大夫咸亨初復故宋司勳掌勳賞  
事隆興初詔省以司封郎中兼領元無專曹官有勳封科以  
令史分頭掌之明改爲稽勳司置郎中一人員外郎一人  
馬質量人小子歷代闕後周有司量中士下士屬冬官府  
羊人後周有典羊中士下士

司燃漢有別火今主改火之事後周司火中士下士又有司  
烜中士屬秋官府漢以後火政不修官失其守說見火政考  
掌因後周有司固上士中士

司險魏尚書有水部郎歷代或置或否後魏北齊有水部屬

都官尙書掌舟船津梁之事後周有司水中大夫隋初爲水部侍郎屬工部煬帝除侍字唐武德三年加中字龍朔二年改爲司川大夫咸亨元年復舊天寶中改水部爲司水至德初復舊後周又有小司水上士隋改爲員外郎唐龍朔二年以後曹名改而官不易宋水部掌川瀆河渠津梁舟楫運漕水碾磴及隄防疏濬之政令金元無水部而以都水監兼治其事又有津渡河橋管勾等員明工部都水清吏司郎中一人員外郎一人

掌疆厯代無考

候人環人後周有武侯率武環率上士

挈壺氏春秋列國得置挈壺氏見詩小序秦漢無聞後周有

司晨中士下士隋設漏刻博士及生員唐曰挈壺正宋因之  
金有漏刻科三十五人元復爲挈壺正明改曰挈壺郎  
射人檀弓射人師扶左蓋諸侯司射之臣亦云射人後周有  
司射下大夫上士又小司射上士唐開元禮左右司射二人  
明集禮司射亦二人

服不氏後世闕後周有捕獸中士下士屬秋官府宋養象所  
掌調御馴象

射鳥氏下士羅氏下士漢伏飛掌弋射有九丞兩尉後周有  
弋禽中士下士屬秋官府

掌畜下士漢右扶風屬官有掌畜令丞後周有掌禽中士下  
士屬地官府唐京都諸園苑監掌蕃養六畜宋太僕所屬有



致遠務掌分養雜畜明上林苑監所屬有蕃育署育鵝鴨雞  
典署一人正七品署丞一人正八品

司士杜佑云今吏部之始宜出夏官之司士後周有司士上  
士中士殷制司士與司徒等並列爲五官唐大朝會侍中奏中嚴外辦殿中  
侍御史糾不如儀者與此職相近

諸子鄭眾云周天子之官有庶子官與此職同秦置中庶子  
庶子員漢因之有庶子員五人史丹王商歐陽地餘並爲中  
庶子王莽改爲中尙翼子後漢中庶子五員職如侍中庶子  
無員職如三署中郎凡庶子主官中并諸吏之適子及支庶  
版籍魏因之在吳爲親近之官晉中庶子庶子各四員職比  
散騎常侍及中書監令皆以俊茂者爲之或以郡守參選若

釋奠中庶子扶左庶子扶右宋與晉同武冠平巾幘絳朝服  
元嘉初詔二率中庶子隨太子入直上官十四年又詔還直  
東宮齊庶子用人卑雜梁天監七年詔革選其年以太子中  
舍人司徒從事中郎爲之凡中庶子四人以功高者一人爲  
祭酒行則負璽前後部護駕與功高中舍人一人共掌其坊  
之禁令庶子四人掌侍從四人獻納得失與功高通事舍人  
一人共掌其坊之禁令陳因梁制後魏亦有中庶子庶子官  
北齊門下坊中庶子四人典書坊庶子四人隋分爲左右庶  
子各二人分統門下典書二坊事唐亦各二人分掌左右春  
坊事龍朔二年改左右庶子爲左右中護咸亨初復舊左擬  
侍中右擬中書令宋太子左右庶子左右諭德其制不常設

多以他官兼領仁宗神宗升儲庶子論德各置一人欽宗升儲置一人孝宗以建王立爲皇太子置庶子論德各一人除右虛左其後左右並置遼南面左春坊長官曰太子右庶子元置中庶子一人明左右春坊各置一人

司右列國車右皆有專職詳見邦國之官秦漢不見此職後周有司右中大夫小司右下大夫上士

虎賁氏下大夫中士漢武帝建元三年初置期門比郎中無員數多至千人平帝元始元年更名虎賁郎置中郎將領之其有虎賁中郎將主虎賁宿衛冠插兩鵝尾紗縠單衣虎文錦袴餘郎亦然凡有虎賁中郎將虎賁侍郎虎賁郎中節從虎賁皆父死子繼若死王事亦如之

自魏至隋皆有後周又有右虎賁率上士中士

唐以後不設元至元十六年立虎賁軍元貞元年改爲虎賁親軍都指揮使司領漢書虎賁中郎將秩比二千石虎賁中郎比六百石虎賁侍郎比四百石虎賁郎中比三百石虎賁比二百石皆無員數直宿衛侍從虎賁武騎皆鶡冠虎文單衣

旅賁氏漢衛尉屬官有旅賁令中興省宋初置旅賁中郎將一人職如虎賁中郎將後周有右虎賁倅長右旅賁倅長上士下士又有右旅賁率上士中士唐初置率府有中郎郎將官永徽元年以太子名中改諸率府中郎將爲旅賁郎將其郎將改爲翊軍後或改或省

節服氏方相氏後世闕

隋唐儀禮有方相氏喪禮亦設方相魃頭皆非常職

太僕下大夫周穆王以伯冏爲太僕正掌輿馬秦因之周官校人掌馬巾車掌車太僕兼其任焉漢初夏侯嬰常爲之領

五監六廐令王莽改太僕爲太御後漢太僕亦掌車馬天子每出奏駕上鹵簿用大駕則執馭魏因之晉銀章青綬五時朝服進賢兩梁冠佩水蒼玉過江後或置或省太僕旣省而驂駟廐爲門下之職晉宋以來不常置郊祀則權置太僕執轡事畢則省齊亦然梁太僕卿位視黃門侍郎陳因之後魏兼置少卿北齊太僕寺統驂駟左右龍左右牧乘黃車府署卿及少卿各一人後周如古周隋如北齊煬帝加置少卿一人唐龍朔二年改太僕爲司馭咸亨初復舊光宅元年改爲司僕神龍初復舊卿一少卿本一員景雲元年加一員宋太僕寺判事一人中興後廢寺并入兵部遼南面有太僕寺金不置元太僕寺隸中書至大四年定太僕卿少卿等官明太

僕寺卿一少卿三

一佐寺事一督管馬一督畿馬

後又立北平行太僕寺丞

樂遷都舊寺在滁州者改爲南京太僕寺

秦蕭田曰周太僕主正王服位出入王之大命漢之尙書唐之門下是其職與後世之太僕不同

小臣後世中涓謁者之屬沿革未聞

祭僕御僕隸僕沿革無考

弁師秦以來尙冠統于尙衣唐織染署令掌供天子冠冕元近侍有尙冠奉御副奉御將作院所屬有漆紗冠冕局明內省置巾帽局掌造內府冠帽設大使副使各一人秩皆九品又有尙冠奉御秩六品

司甲司兵司戈盾司弓矢漢有武庫令屬執金吾秩六百石

後漢太僕屬官有考功令丞主作兵器弓弩刀鎧之屬成則付執金吾入武庫魏晉因之宋尙書庫部屬官有武庫令掌軍器齊因之梁衛尉寺統武庫署令丞掌甲兵及吉凶儀仗後周依周官隋衛尉寺統武庫署令二人唐因之後減置一人丞一人宋不置所掌屬之內庫及庫部郎中金武庫令丞各一掌諸路甲仗武器署別置提點及令丞掌旗鼓笛角之事元武備寺所屬有利器庫廣勝庫秩皆從五品又庫部郎中之職始亦出于司甲等四官魏尙書有庫部郎晉因之宋庫部主兵仗歷代或有或闕後魏北齊庫部屬度支尙書掌凡戎仗器用後周有武藏中大夫隋初屬兵部爲庫部侍郎煬帝除侍字唐武德加中字龍朔二年改爲司庫大夫咸亨

初復舊天寶十一年改庫部爲司庫至德初復舊掌軍器儀仗鹵簿法式及乘輿等初後周依周禮司兵中士設小武藏下大夫又有司仗司弓矢司甲司稍司刀盾等中士下士隋改置員外郎宋庫部郎中員外郎一人建炎三年以駕部兼庫部明兵部武庫清吏司郎中員外郎主事各一人添設武庫主事二人

繕人上士下士橐人中士主弓弩矢箠隋少府所屬有弓弩署唐因之置弩坊署令丞各一監作二人宋軍器監有東西作坊繕治兵器又有物料庫掌收羽箭皮角塲掌收筋角金有利器署掌修弓弩元武備寺所屬有弓局箭局弦局各使副又有弓匠提舉司



戎右齊右後周有戎右齊右下大夫

道右後周有道右上士

大馭後周有大馭中大夫又有小馭下大夫

戎僕齊僕後周有戎馭齊馭下大夫

道僕田僕後周道僕田僕上士

馭夫後周有奉車馭夫不列命數唐太僕寺所屬有執馭馭士等名宋亦有之詳見儀衛篇

校人中大夫趣馬下士圉師圉人漢西京太僕有龍馬長東京有未央廄令掌乘輿及宮中之馬其後左駿廄令別主乘輿御馬魏爲驂驪廄晉有驂驪龍馬二廄自宋以後分驂驪廄屬門下梁太僕有龍廄及內外等廄陳因之北齊有驂驪

左右龍廐等署後周左右廐各上士一人隋如北齊唐改龍廐爲典廐署置令丞而殿中省尙乘局有奉御直長掌內外閑廐之馬武后置仗內六閑以中官爲內飛龍使又置閑廐使分領殿中太僕之事宋太僕寺屬官有左右驂驥院左右天駟監掌國馬別其駑良以待軍國之用鞍轡庫應奉御馬鞍勒有使副及監官二人金殿前尙廐局設提點使副掌御馬調習收養大定末增副使一員管小馬羣元尙乘寺掌羣牧駟馬驢騾及取南北遠方馬匹置卿少卿各二員所領有資乘庫提點大使副使明御馬監掌廐馬匹令一正七品丞一從七品建文又放唐制立典廐署成祖罷之

秦漢以來養馬之官皆隸太僕北齊十二閑之馬有驂

駟署奉乘統之唐尙乘局屬殿中省奉御四人一人掌左六廐馬一人掌右六閑馬一人掌粟草飼丁一人掌鞍韉轡勒唐職官志習馭掌調六閑之馬掌閑掌飼六閑之馬以周官考之唐之奉御周之校人趣馬也唐之習馭掌閑周之廋人圉師也

校人牧師皆駕部之任杜佑云與司馬巾車並同斯職魏晉尙書有駕部郎宋駕部屬左民尙書齊亦有之後魏北齊並曰駕部郎中後周有駕部郎中大夫屬夏官隋初爲駕部侍郎屬兵部煬帝除侍字唐武德三年加中字龍朔二年改爲司輿大夫咸亨初復舊天寶中改駕部爲司駕至德初復舊掌輿輦傳乘郵驛廐牧司牛馬騾驢閑遺雜畜又周官有輿

司馬上士後周依周制設小駕上士隋開皇六年改置員外郎煬帝改曰承務郎唐爲駕部員外郎龍朔咸亨光宅神龍並隨曹改復宋駕部郎中員外郎各一人掌輿輦車馬驛置廐牧之事建炎三年詔并大僕寺隸焉金殿前司所屬有尙輦局使副使掌承奉輿輦事元罷衛尉院立尙乘寺有卿少卿掌上方輿輦鞍轡明兵部車駕清吏司郎中員外郎主事各一添設車駕郎中一人主事二人

牧師下士秦漢邊郡置六牧師令魏晉以下因之隋有典牧牛羊等署各置令丞唐置乘黃等四署令丞各四人掌外牧及造酥酪脯腊之事宋羣牧司制置使一人副使一人都監二人判官二人掌內外廐牧之事遼而面有諸牧監金明昌

四年置諸羣牧所又立提舉圉牧所泰和三年隸各路統軍司元典牧監置卿監等官掌孳畜之事屬詹事院明太僕寺統羣牧監後廢監令民養馬太僕專領之而苑馬寺卿少卿所領有六監二十四苑每苑設圉長一人又漢太僕屬官有牧師諸苑三十六所在北邊西邊以郎爲苑監官奴婢三萬人分養馬三十萬頭中興省漢陽有牧馬苑令羽林郎監領魏置牧官都尉晉因之自後無聞北齊有左右牝牡駝牛羊等署令後周曰典牝典牡上士中士又有典駝典羊典牛中士隋曰典牧署牛羊署令丞唐初因之分爲上中下牧監置監副監丞主簿宋太僕屬官有駝坊車營致遠務掌分養雜畜以供負載般運元祐初置左右天廐坊聽民間承佃牧地

紹聖初置羣生監中興後改屬兵部元至大三年立羣牧監  
置卿少卿掌宮中位下羣畜隸徽政院明有南京太僕寺行  
太僕寺苑馬寺各以地方分屬各屬皆有管馬官府以通判  
州以判官縣以丞簿衛以指揮所以千百戶弘治十八年令  
各州縣馬不及五百匹者罷管馬官以掌印官帶管

巫馬下士醫四人北齊內廐局有馬醫二人唐尙乘局置獸  
醫七十人掌療治病馬及申駒數

廐人下士閑二人北齊驛驢署有奉乘十人管十二閑馬後  
周左右廐各有奉乘二十人隋煬帝置尙乘局奉乘十人唐  
增至二十二入每閑二人金尙廐局有掌廐都轄副轄不拘  
員數

職方氏歷代無聞至後周依周官隋初有職方侍郎煬帝除  
侍字唐武德中加中字龍朔二年改爲司城大夫咸亨元年  
復舊掌地圖城隍鎮戍烽堠防人路程遠近歸化道渠又周  
官職方上士後周依周官隋改置員外郎同戶部宋職方郎  
中一員員外郎一員掌天下地圖以周知方域之廣及城隍  
堡塞烽堠之事蕃人歸明內附之事建炎三年并省冗職以  
兵部郎中兼職方明兵部職方清吏司郎中員外郎主事各  
一人添設職方郎中一人主事四人

土方氏懷方氏後周有土方懷方中士下士

合方氏歷代無聞

訓方氏後周有訓方中士下士

形方氏歷代不置

山師川師中士下士漢山海之禁掌于少府後周依周制設  
山師川師唐四方山川之異產籍隸于戶部郎中在外則司  
士參軍通山澤之利致壤異之貨凡知山澤有異寶異木及  
金玉銅鐵彩色雜物處堪供國用者奏聞宋提舉院治司掌  
收山澤之利元立屯田打捕總管府掌湖泊山場漁獵以供  
丙膳又有常湖等處茶園都提舉司秩正四品明有河泊所  
山廠提督亦其類也

遷師中士下士後世闕

匡人後周有司匡中士下士屬秋官府

擇人沿革無考



都司馬若後世王國中衛王府司馬之屬  
家司馬若後世公府叅軍州郡別駕之屬

### 秋官沿革

大司寇今刑部尙書唐虞之時士官以正五刑殷爲司寇周  
爲大司寇秦置廷尉位次三公亦其任也漢成帝時尙書初  
置二千石曹主郡國二千石又置三公曹主斷獄後漢光武  
改三公曹主歲盡考課諸州郡政二千石曹掌中都官水火  
盜賊詞訟罪法亦謂之賊曹重于諸曹魏青龍二年置尙書  
都官郎佐督軍事晉復以三公尙書掌刑獄宋三公比部皆  
主法制又置都官尙書主軍事刑獄領都官水部庫部功論  
四曹齊梁陳並有都官尙書後魏亦有都官尙書北齊都官

統都官二千石比部水部膳部五曹又有三公曹掌諸曹囚  
帳斷罪赦日建金雞等事屬殿中尙書後周有秋官大司寇  
卿掌刑邦國其屬官又有刑部中大夫掌五刑之法隋初有  
都官尙書開皇三年改都官爲刑部尙書統都官刑部比部  
司門四曹亦因後周之名唐因之龍朔二年改刑部尙書爲  
司刑太常伯咸亨元年復舊武后改刑部爲秋官神龍初復  
舊天寶中改爲憲部至德初復舊總判刑部都官比部司門  
事宋刑部判部事二人淳化二年以刑部覆大辟案增置審  
刑院知院事一人凡四方以刑獄來上則讞于審刑院大中  
祥符二年置糾察在京刑獄司元豐三年併歸刑部五年官  
制行刑部始專其官遼北面有夷離畢院掌刑獄之事視刑

部南面有刑部尙書同吏部金刑部尙書一員正三品元刑部尙書三員正三品掌天下刑名法律之政令中統元年以兵刑工爲右三部至元元年析置工部而兵刑仍爲一部七年始別置刑部尙書明初設刑部尙書掌天下刑名及徒隸勾覆關禁之政令其屬有四曰憲部比部司門部都官部後改爲十二部又改爲清吏司永樂辛丑北京建置刑部

小司憲大夫後周依周官隋煬帝置刑部侍郎唐因之龍朔二年改爲司刑少常伯咸亨元年復舊他時曹名或改而官不易掌律令定刑名按覆大理及諸州應奏之事宋侍郎一人舊制定奪審復除雪敘復移放尙書專領之若制勘體量奏讞糾察錄問長貳通治之中興長貳互置隆興置一員

遼南面刑部侍郎同吏部金刑部侍郎一員正四品元刑部

侍郎二員明刑部左右侍郎各一人

唐職林云有大獄卽命御史中丞刑部侍郎大

理卿充謂之三司使

士師下大夫今刑部郎中漢尙書有三公曹後漢有二千石

曹魏有都官曹皆掌刑罰獄訟之事或爲侍郎或置郎中後

周有小刑部下大夫屬秋官府隋初置刑部侍郎煬帝除侍

字又改爲憲部郎唐武德三年改爲刑部郎中龍朔二年改

爲司刑大夫咸亨元年復舊與侍郎同又大司寇之屬有上

士後周依焉隋文帝置刑部員外郎煬帝改爲憲部承務郎

唐武德三年改爲刑部員外郎其後曹改而官不易宋刑部

郎中二人分左右廳掌詳覆敘雪之事建炎時郎中二員職

無分異紹興時詔依元豐舊法分廳治事左以詳覆右以敘  
雪員外郎一人遼南面刑部郎中員外郎並同吏部金刑部  
郎中一員從五品員外郎二員從六品主事二員從七品元  
刑部郎中二員員外郎五員後省爲二主事大德三年置司  
程官四人明刑部所屬有十三清吏司各郎中一人主事二  
人添設司主事一人漕運理刑主事一人

周秋官之任古爲大理列國時亦有大理秦爲廷尉漢因之  
掌刑辟凡獄必質之朝廷與眾共之之義也兵獄同制故曰  
廷尉景帝中元六年更名大理武帝建元四年復爲廷尉哀  
帝元壽二年復爲大理後漢廷尉卿凡郡國讞疑皆處當以  
報皆以世家爲之而郭氏尤盛建安中復爲大理魏黃初元

年改爲廷尉歷代皆爲廷尉梁國初建曰大理天監元年復改爲廷尉舊用黃門後視祕書監有正監平三人元會廷尉三官與建康三官皆法冠元衣朝服以監東西中華門手執方木長三尺一寸謂之執方陳因之後魏亦曰廷尉北齊曰大理寺置卿少卿各一人後周有刑部中大夫掌五刑之法附萬人之罪屬大司寇隋初與北齊同煬帝加置少卿二人唐龍朔二年改大理爲詳刑咸亨元年復舊光宅元年改爲司刑神龍元年復舊卿一人掌鞠獄定刑名決諸疑讞少卿二人宋大理寺以朝官一員或二員判寺事一員兼少卿事熙甯九年置卿一少卿二丞四建炎三年并省寺監而大理如故省卿而斷刑治獄少卿各一員遼南面大理寺官曰大

理寺卿寺少卿丞主簿金大理寺天德二年置自少卿至評事漢人通設六員女直契丹各四員元世祖陞大理寺爲都護府至大四年置經正監本卿太監少監監丞明初置大理寺正三品設卿少卿丞評事其後旋革旋復永樂中定設大理寺卿一人左右少卿左右寺丞各一人

秋官卿師之屬秦爲廷尉正漢因之後漢一人魏晉謂正監平爲廷尉三官其後皆有隋開皇三年增爲四員煬帝增爲六員唐二人通判寺事龍朔二年改爲詳刑大夫咸亨初復舊宋神宗復置大理獄後置寺正元豐五年刑司乞分評事司直與正爲斷司丞與長貳爲議司凡斷案先上正看詳當否論難改正然後過議司覆議建炎并省斷治獄寺正各一

員遊育大理正金元皆有明置左右寺正左右寺副各一人鄉士遂士縣士後周有鄉法遂法縣法上士中士

方士後周有稍法畿法上士中士又有方憲上士中士

訝士中士唐主客郎中掌二王後及諸蕃朝聘之事與此職相近又經文云居館則帥其屬而爲之蹕出入則道之唐宋有四方館使引進使明有提督四夷館主客主事九關通事使皆其類也惟不見理四方獄訟之事

朝士後周有掌朝下大夫小掌朝上士唐門下省典儀二人掌殿中版位之次元有殿中司御史二人明殿廷儀禮司使副各一人

司民中士漢尙書一人主戶口魏有左民郎曹西晉兼置右



民部曹東晉及宋齊惟有民部曹梁陳爲左戶部後魏爲左戶部北齊有左民部曹隋初民部部曹置侍郎唐改爲民部郎中高宗改爲戶部郎自唐至明天下戶口版籍皆以戶部郎中掌之

漢魏以來州郡皆有戶曹掾隋日司戶參軍唐改爲戶曹參軍

司刑後周有司憲上士中士又有司憲旅下士

司刺後周有司刺上士中士

司約司盟後周有司約司盟中士下士

職金魏尚書有金部郎其後歷代多有之北齊金部主才量尺度內外諸庫藏文帳隋初爲金部侍郎煬帝除侍字唐武德中加中字龍朔二年改金部爲司珍咸亨初復舊天寶中改爲司金至德初復舊掌庫藏金寶貨物權衡度量等事自

開元二年置鑄錢使皆以他官爲之宋金部判司事一人以無職事朝官充凡庫藏出納之節金貨財貨之用皆歸三司而權衡度量之制出于太府本司無所掌元豐官制行郎中員外郎始實行本司事建炎元年詔常平司見管山澤坑冶並依舊撥隸金部三年罷太府寺隸金部明戶部屬有金部官無定員

司厲下士漢有都官從事掌中都官不法事屬司隸校尉魏明帝置都官郎晉宋齊都官郎中二人北魏後齊一人後周秋官府有司厲之職掌諸奴男子入于罪隸女子入于春館之事隋初置都官侍郎煬帝除侍字唐武德加中字龍朔二年改爲司隸大夫光宅元年復故又後周依周官有司厲下

士隋文帝改爲員外郎煬帝改曰承務郎唐爲都官員外郎  
龍朔光宅隨曹改復宋都官判司事一人元豐定制郎中員  
外郎參掌徒流配隸及吏籍之事建炎三年詔以都官兼比  
部金刑部員外郎一員掌宮戶配隸明刑部所屬有都官部  
郎中員外郎各一人主事四人

司閹中士下士漢之獄城曰圜武帝置中都官獄有掖庭獄  
丞都尉史晉令有獄左右丞各一人朱齊因之梁陳獄丞  
二人後魏北齊同正九品下隋置獄掾八人歷代並以卑微  
下士爲之唐置丞四人以流外入仕者爲之宋神宗置大理  
獄丞四人金上京中都各有司獄一員元大都置司獄司司  
獄獄丞各一員獄典二員明太祖置獄曰貫城隸大理寺刑

部所屬有司獄司司獄六人提牢主事月更一人

犬人下士漢有狗監主給天子獵犬後周有掌犬中士下士唐開廐使押五坊五曰狗坊以供時狩

掌囚後周有掌囚中士下士

掌戮沿革無考

司隸漢武帝征和四年初置司隸校尉持節從中都官徒千二百人捕巫蠱督大姦猾後罷其兵察三輔三河弘農元帝初元四年去節後諸葛豐爲司隸又加節尋復去之司隸去節自豐始也成帝元延四年省綬和二年哀帝復置但爲司隸除校尉字冠進賢冠屬大司空比司直司隸掌察皇太子以下行馬內事皆主之專道而行專席而坐初除皆謁兩府

後漢復爲司隸校尉所部河南尹河內右扶風左馮翊京兆尹河東弘農凡七郡治河南洛陽無所不糾惟不察三公廷議處九卿上朝賀處九卿下凡司隸屬官有從事史十二人其都官從事史最爲雄劇主察百官之犯法者魏晉司隸與二漢同司隸于端門外坐在諸卿上絕席其入殿按本品秩在諸卿下不絕席初以司隸官屬制置如周儀而俗稱之司州及魏晉乃以京輔所部定名置司州以司隸校尉統之及東晉渡江罷司隸校尉官變其職爲揚州刺史後魏北齊爲司州牧後周有司隸下大夫掌五隸及徒者捕盜賊囚執之掌屬大司寇隋初有雍州牧後煬帝置司隸臺有大夫一人掌諸巡察薛道衡爲司隸大夫別駕二人分察畿內一人按

東都一人按京師後又罷司隸臺而畱司隸從事之名不爲常員臨時選京官清明者權攝以行唐無司隸而有京畿採訪使亦其職也宋無遼無司隸校尉之名五京各置警巡院官曰警巡使東京別置軍巡院官曰東京軍巡使中京別置巡邏司官曰中京巡邏使所掌皆司隸校尉事也興宗重熙十三年又置契丹警巡院金諸京置警巡院使一員掌平理獄訟警察別部總判院事副一員掌警巡之事元上都畱守司屬有警巡院達魯花赤警巡使各一員副使二員大都兵馬都指揮使司屬有左右警巡院達魯花赤及使各一員副使判官各三員明巡警改置中東西南北城兵馬指揮司初設兵馬指揮司都指揮副都指揮知事尋改兵馬指揮司指

揮使副指揮知事城門設兵馬洪武十年改爲指揮副指揮  
革知事二十三年定爲兵馬指揮司建文中改爲五城兵馬  
司指揮副指揮爲兵馬副兵馬靖難後復故本司各指揮一  
人副指揮五人指揮掌巡捕盜賊街道溝渠囚犯火禁之事  
副指揮爲之貳

罪隸緝隸閩隸夷隸貉隸後周有掌罪隸掌蠻隸掌戎隸掌  
狄隸掌夷隸皆中士下士

布憲後周有布憲下大夫小布憲上士明有憲部清吏司一  
禁殿監禁暴氏後周有禁殿監中士下士禁暴中士  
野廬氏後周有野廬中士下士

蜡氏雍氏萍氏後世闕

司寤氏干寶注今都候之屬後漢左右各一人主劔戟士微  
循宮及天子有所收考宮中諸有劾奏罪左都候執戟戲車  
縛送付詔獄在宮大小各付所屬見尙書令僕射尙書皆執  
板拜見郎對揖屬衛尉後無

司烜氏後周有司烜中士下士

條狼氏後世闕

修閭氏後周有修閭中士下士

冥氏沿革無考

庶氏後周有庶蠹中士下士

穴氏是氏後世無聞

柞氏薤氏後周有司柞司薤中士下士



周氏後周有翦蠹中士下士

若蕞氏赤友氏蠅氏壺涿氏庭氏後世關

唐長孫无忌云覆具設若蕞之官去

三百六十之屬後世廢闕者多矣

銜枚氏後周有銜枚中士下士屬夏官府

伊耆氏後周有伊耆氏中士下士

大行人秦有典客掌諸侯及歸義蠻夷漢初爲連敖後改爲  
鴻臚景帝二年令諸侯王薨列侯初封及之國大鴻臚奏諡  
諫策列侯薨及諸侯太傅初除之官大行奏諡諫策中六年  
改大鴻臚爲大行令武帝太初元年更名大鴻臚又更名其  
屬官行人爲大行令秦時又有典屬國官掌蠻夷降者漢因  
之成帝河平元年省并大鴻臚後漢大鴻臚卿一人諸王入

朝當郊迎典其禮儀及郡國上計餘職與漢同凡皇子拜王贊授印綬及拜諸侯諸侯嗣子及四方夷狄封者臺下鴻臚召拜之王薨則使使弔之及拜王嗣魏及晉初皆有之自東晉至宋齊有事則權置兼官畢則省梁除大字但曰鴻臚卿位視尚書左丞常導護贊拜後魏曰大鴻臚北齊曰鴻臚寺有卿少卿各一人亦掌蕃客朝及吉凶弔祭後周司寇有蕃部中大夫掌諸侯朝覲之敘有賓部中大夫掌大賓客之儀隋文帝開皇三年廢鴻臚寺入太常十二年復置領典客司儀崇元三署煬帝降卿爲從三品唐因之龍朔二年改爲同文正卿咸亨初復舊光宅初改爲司賓寺卿神龍初復舊卿一人掌賓客及凶儀之事冊諸蕃酋渠則奉命往少卿本一

眞景雲二年加一員宋鴻臚寺判寺事一人元豐官制行置  
卿少卿丞主簿各一人中興省併入禮部遼南面鴻臚寺卿  
少卿如宋制又有北面客省局南面客省局使副等官金宣  
徽院所屬有客省引進東西間門諸使而鴻臚寺不設元以  
禮部會同館掌接伴引見外國之來朝貢者以通政院廩給  
司掌各省四方邊遠使客飲食供張等事而鴻臚寺亦不設  
明初置待儀司九年改爲殿庭禮儀司三十年始改鴻臚寺  
設卿一人少卿二人

文獻通考周禮大行人掌九儀及賓客之位漢有通事舍

人宋朝橫班有內客省使引進使四方館使

唐四方館使以通事舍人

判隸中書省石晉始有卿監專掌判館者

宋初以檢校校官判館道熙四年改置使名東上閣門使西

上閤門使其供職於內者多用國戚世族號爲華要禮均  
侍從政和官制橫班使副之名既改爲大夫而其職任則  
命內外官知焉其後所除總名知閤門事仍兼客省四方  
館之職焉靖康元年詔閤門並立員額 故事閤門無通  
事舍人而通事舍人沿唐制自隸中書省如抽赴閤門並  
稱閤門祇候其後直授閤門通事舍人非舊制也天禧中  
去閤門二字政和六年改爲宣贊舍人又舊以閤門通事  
舍人閤門祇候二等謂之閤職

小行人下大夫馬融云掌使之官行夫下士鄭云主國使之  
禮春秋列國有行人漢常以中郎將建節使絕域不立專官  
唐宋元俱無惟後周有司行下士明置行人司司正一員左

右司副二員行人三百四十五員後減爲三十七員

司儀漢大鴻臚有理禮郎又有大行治禮丞自後無聞後魏太和中置司儀官北齊置署令丞後周司儀上士一人中士一人隋如北齊唐因之置令丞各一人領司儀齋郎掌設幕士等宋鴻臚寺官屬有中太一宮建隆觀等各置提點所掌殿宇齋宮器用儀物陳設錢幣事元置侍儀使掌外國朝覲之事屬禮部明鴻臚寺屬官有司儀署丞一人鳴贊八人序班五十四人又設通事司儀典陳設引奏典贊禮儀皆以署丞領之鳴贊贊禮凡內贊通贊對贊接贊傳贊各供其事序班侍班齋班糾儀及傳贊

司儀上士中士卽後世典儀之任齊職儀云東宮殿中將軍

屬官有導客局置典儀錄事一人掌朝會之事梁有典儀之職未詳何曹之官掌唱警唱奏之事朱服武冠陳亦有之後魏置典儀監史闕其員及所掌唐初隸門下省初用人皆輕至貞觀李義府爲之是後常用士人領贊者以知和唱之節及殿庭版位之次宋無考遼北面敵烈麻都司掌禮儀金無元世祖至元八年敕元正聖節朝會凡百官表章外國進獻使臣陛見朝辭禮儀皆隸典儀司明初設司儀四人秩九品建文罷司儀署成祖復舊

環人中士後世闕

象胥每翟上士一人中士二人秦漢以來置謁者臺主賓贊受事隋始置通事舍人十六人煬帝改爲通事謁者置四方

館隸鴻臚寺以待四方使者唐復改爲通事舍人通奏張納以善詞令者爲之隸四方館宋有閣門宣贊舍人又有禮賓院掌譯蕃語屬鴻臚寺遼門下省置通事舍人金閣門通事舍人二員掌通贊勞問之事元侍儀司所屬通事舍人十六員譯史一人通事一人明設翰林院提督四夷館有各國通事少卿一員主之其審言語譯文字考校四夷館譯字生通事之能否則專屬于禮部主客郎中

掌客上士中士秦官有典客漢改爲鴻臚鴻臚屬官有大行令丞魏改大行令爲客館令晉改爲典客宋分置南北客館令齊梁陳皆有客館令丞後魏初曰典客監太和中置主客令北齊有典客署後周置東西南北四掌客上士下士隋初

又曰典客署置令丞煬帝改爲典藩署唐爲典客署置令丞各一人掌二王後蕃客辭見宴接送迎及在國夷狄宋鴻臚寺官屬有往來國信所掌大遼使介交聘之事都亭西驛管幹所掌河西蕃部貢奉之事禮賓院掌北諸國朝貢館設及互市譯語之事懷遠驛掌南諸國貢奉事同文館管勾所掌高麗使命元至元二十五年改會同館爲四寶庫置大使副使明鴻臚寺官屬有司賓署丞一人典外國朝貢辨其等秩教其禮儀又禮部主客郎中其原亦出于周之掌客漢金岑爲主客服虔云主胡客屬大鴻臚成帝初置尙書有客曹主外國裔翟後漢光武分爲南主客北主客二曹魏亦爲南主客事晉分爲左右南北四主客或單爲客曹宋齊梁陳單有



主客後魏吏部管南主客祠部管左主客北齊改左主客爲  
主爵南主客爲主客隋初爲侍郎煬帝除侍字尋又改爲司  
藩郎唐武德初改爲主客郎中龍朔二年又改爲司藩咸亨  
元年復舊掌二王後又典諸藩朝聘宋主客掌諸藩朝貢宴  
設賜予之事建炎三年詔禮部郎中一員兼主客元令史分  
掌名頭四方使客隸于禮部明主客清吏司掌華彝朝貢往  
來宴賜之事郎中員外郎各一人主事二人提督四彝館主  
客主事一人

掌訝後周有掌訝中士下士

掌交後周有掌交中士小掌交上士

掌察後周有掌察中士下士

掌貨賄後周有掌財賄中士掌貨賄下士

朝大夫後周有掌朝下大夫

都則都士後周有稍法畿法上士中士